


# TÓBÓNG GU BÈ DWATA



## Tóbóng Gu Bè Dwata

Bè nim “Tóbóng Gu Bè Dwata” ni, gunun stifun yó kem Udél Dwata segtón ebè yó kem dê gel hennagì. Bè dou kehedem du, yem ali hyu ke tódô lemwót bè kem dumu sulat lem Udél Dwata yem udél segtón ebè yem sotu hennagì lem Udél Dwata.

Yem Udél Dwata tey wen gunun tmóbóng yó kem tau ali móyô mò yem hyu. Ke deng hegsel yem tau ne là buden gel mò salà lanen deng hemmóyô ke Dyisas Kdays yem gunù mogot, ne tahu lemwót lem nawahen kehtahuhen du yem deng lemwà du, tódô gnómen se yem kligal ne kenek nawa lemwót bè yem gunun mogot yó. Deng nmou se dou nim ni bè 1937, ne là kô deng kóhu du efet ni kmoen ni yem tey hyu kesegbót me yem deng gunuhu mogot ni. Kóyóu ke géhél ye se sefyu béléen kuy yem gunù gewà ne gunù mogot ni ke là deng tehe nmò ye du se kuy.

—Watson Goodman (1920-2002)

# **Yem Kun Kbong Nawa Dwata**

## **Hdom 5:8**

**Okóm yem Dwata, tey kehegfanen yem nawahen ebélê tekuy bë tum tehe le katay Kdays bë salà tekuy. Fen matay bélê tekuy igò tekuy tolo alì gemsalà.**

## **Dyan 13:1**

**Ne ni deng mon haya ne kehtohen yem mò ken bë yem Kdaw Khius. Tódô tngón Dyisas yem móyón ktebelén yem benwu bud mulék ebè Maen. Tey tendo gel kbong nawahen kul yó kem tau gel lemolò du, ne ni hegfanen bélê le ne yem alì kbong nawahen kul.**

## **Són Bok Snulat Dyan 1:5**

**Deng tehe hnatay le nim Dyisas, okóm deng bud bentik Dwata. Du se tanay bentiken là buden matay ne. Bud du se kmamal yem kentihen tau mogot benwu talak tonok. Tey kbong nawahen tekuy Dyisas. Gloken hamà yem kun litô bélê tekuy mò lanen lemwà tekuy gu lem yó kem salà tekuy.**

## **Dyan 3:16**

**Tey alì kbong nawa Dwata kul yó kem tau bë klamangen benwu, gloken tódô hamà klowil yem Ngaen tek sotu, anì yó kihu tau hemtahu béléen là gógówen elem lanaw ofi, okóm gutahen yem klowil laen dù sónen.**

## **Yedemaya 31:3**

**Deng tehe hegfan Dwata yem nawahen bélê tekuy, yó monen, Laen kô mtukul sónen yem kbong nawahu kuy. Lemwót bë yem óyóu kuy gunu ye móyô mung do.**

# **Yem Kun Kedwata Dyisas**

## **1 Timuti 3:16**

Tahu se, tey hentaw yem kmò klan yem kehewà Dwata tekuy gu lem hatay. Ngem ni se kmoen: Tehe tódô hbaling tau Kdays Dyisas. Yem Tulus Dwata fen hdilô du bè kem tau du se tahu Dwata. Botong hentaw yó kem hógów Dwata gu bè longit bè yem kton le du. Ne sentbong kem tau bè klamangen benwu, ne wen se bè yó kem hmungol du hemtahu béléen. Ne omin Dwata bud hulék du ebè yem tehe kun kegeta ditu bè longit.

## **Matyu 1:22, 23**

Bè ni kem ni, deng gunun tahu yem tehe tulón Dwata hlanen bè yem sotu tehe gna tugoden, yem monen, Angat wen sawang libun tódô mlutut, ne angat mngà logi. Ne angat boluy le du Imanyuwél. Yó lanen yem boluyen yó, tendo nù bélê tekuy Dwata.

## **Dyan 14:9, 10a**

Mon Dyisas se mò du, Deng tey kegenu nù lem blóng ye, Filif, là deng tngón ye do kô efet ni? Yó se tau deng mton do, deng tonen se Mà. Moen de ke monem, Tolokem kum maem? Là hentahuhem du dilóu yem knuu bè Mà ne yem knù Mà béléu?

## **Dyan 1:1 ne 14**

Bè yem hol kbuten gu laanen là deng wen benwu he, deng sana kem yó ne ke Kdays kun. Yó ibahen, Udél Dwata. Du se yem tendo kun dumu seglébéd Dwata, ne lelen bud Dwata he kun . . . Deng tehe baling tau yem niba le Udél Dwata, ne bélê me gunun teyen . . . Laen kô dù sónen yem nawahen ebè tau, ne hlò tahu yem gel tulónen kul.

# Dyisas Yem Hol Kun Ngà Dwata

## 1 Dyan 4:15

Kihu tau hemtahu du yem Dyisas Kdays yem hol kun Ngà Dwata, ne lelen tmulón du bè kem dumuhén snéen, tódô henek béléen ne Dwata. Ne dalang se kun, deng henek bè Dwata.

## Kulasi 2:9

Tek són bè Kdays gunu te mton du yem hol kun kmò Dwata. Ton te béléen bè yem tehe le kehbalingen tau.

## Isaya 9:6

Abay se angat sut lem blóng tekuy yem sotu ngà mò angat tmóbóng tekuy. Bede yem ngà yó logi. Du se angat kmamal yem klamangen benwu. Ne yó angat iba le du, Yem tau hol dandón hulung hmau, Yem Dwata alì geta bè kdéen, Yem hol Mà tekuy là bud wen sónen, Yem tau geta fen mit kenek nawa.

## Luk 1:35

Yó bud mon yem hógów Dwata mò du, monen, Yó hem ktued udél yem Tulus Dwata, ne yem kun kegbek Dwata fen hemlan du béléem. Yó gunum mon, angat boluy le nim ngà angat sut ni, Ngà Dwata.

## Matyu 17:5

Yem igò Fitel tolo mudél, tey lobun sminang bukay lememeck eta le, tódô gungol le yem mudél gu lemen, monen, Ni se hol dou Ngà, gunun nù nawahu. Tey bong kegsengel nawahu béléen. Hol gel hnungol ye yó kem tulónen kuy. Yó se udél gungol le gu lem lobun.

# **Tulón Dyisas Yem Kun Knù**

## **Dyan 8:23**

**Ne bud mon Dyisas se mò kul, monen, Tau ye lenokob longit yó dum kuy. Fene lemwót ta dou. Tau ye tonok yó dum kuy. Fene lemwót bè longit dou.**

## **Dyan 11:25**

**Ou se, mon Dyisas, gunun lemwót btik tau gu lem hatay, ne bud gunu le gemwa klowil le. Yó se hemtahu béléu, anien ke deng matay bud mowil.**

## **Dyan 13:13**

**Gel mon ye mò dou, Uu se yem gunu me gel htolok ne yem gunu me mogot. Tahu se yem gel mon ye yó, mon Dyisas.**

## **Dyan 9:5**

**Bè nim tolo knuu lem benwu, mon Dyisas, hol lumun ke ou yem layag mò hlayag yó kem tau lem benwu.**

## **Dyan 6:35**

**Ne bud mon Dyisas, Ke hningunu yem dou klowil, hol lumun ke ken bemlay klowil laen dù sónen. Yó se tau mógów ebéléu, ne hentahuhé ou, hol lumun ke là buden bitil ne là buden meeng.**

## **Dyan 8:58**

**Ne mon Dyisas se mò kul, Tódô tulónu kuy ktahuhé, gu laan Bdaham là deng sut, deng sana kem yó ne dou.**

## **Dyan 10:7**

**Bud mon Dyisas mò kul, Tódô tulónu kuy ktahuhé. Hol lumun ke ou se bak tikeb kukub yó kem ubiha.**

# Yó Kem Dumu Hentaw Ton Nmò Dyisas

Matyu 14:19-21

Tahu se. Omin Dyisas gotu hyón te bnes yó kem tau. Ne nwahen yem limu botù mambang ne lewu botù utón élen, ne temngel ebè longit, mni bè Dwata. Ominen kembéng yem mambang, ne oguhem yó kem gel lemolò du anì sagid le ebè yó kem tau. Tódô kdê le se gotu mken, ne gotu le se bsow. Timbow gotu sentifun yó kem gel lemolò ke Dyisas yem lukas ken le, botong sfolò lewu abì lukasen. Yó kwen kem logi lembang mken, là gomong nsó le du kem libun ne kem ngà, botong limu libu.

Luk 5:5, 6

Ne bnalà Simun, Dyisas, monen, Deng suloy me buteng ne hmuket, ewenem yó, laen kô dù guta me. Okóm ke yó monem, na me na bud hmuket sen. Ne tahu se, kewót le bè yó ne e bud hmuket. Ya tey tawanen, botong wen gunun ksê yem huket le.

Matyu 20:30 ne 34

Ne wen lewu tau butô myón bè kilil lan. Tikóng gungol le yem klan Dyisas bè yó, tódô kendel henmung le tmaba, mon le, E Dyisas sfu tehe Dabid, hol knoduhem mi . . . Ya tey kkodu Dyisas kul yó kem tau yó. Ominen mdù bè mata le. Tódô sen-gengen se bud kton le, ne tódô henmung lolò le Dyisas.

# Dyisas Kdays Mò Du Kdéen ne Du Gunù Mogot

## Kulasi 1:16

Deng hedlimun Dwata ke Kdays yem kentihen nù bè longit ne kentihen nù te tonok. Kentihen ton ne kentihen là ton mata du, gotu dlimunen lu. Ne kentihen hógów Dwata gu bè longit, gotu dlimunen lu. Balù Seitan, dalang se yó kem kun gel dók, són Kdays tehe gotu dmimun kul. Tódô kdéen gotu dlimun Kdays, ne tek són du fen mogot kul.

## Hiblu 1:2

Okóm tólóng ni kmoen ni. Yem kudél Dwata ebélé tekuy, deng hlanen bè yem Ngaen. Yem Ngaen yó, du se yem deng fen hedlimunen yem kentihen ne deng gotu hfunen du snéen.

## Hdom 14:9

Deng tehe matay Kdays ekni, okóm deng bud btik gu lem lebengen. Yó gunun mò du yem yó, anì du mò gunu le mogot yó kem kdéen tau hemtahu tolo mowil dalang se yó kem kdéen hemtahu deng matay.

## Dyan 1:3

Ne hlan Dwata béléen kedlimunen du yem kdéen. Tódô kentihen deng dlimun Dwata, gotu hlanen béléen.

## Nmò Yó Kem Hógów Dyisas 2:36

Yu kem tau semfu gu bè Sdaél, mon Fitel, yem Dyisas deng hnesek ye bè yem koyu senfifay, du se nmò Dwata mò gunu tekuy mogot. Du se yem deng nélék Dwata mò hkamalen yem klamangen.

## 1 Kudin 1:9

Tey gsalig yem Dwata. Deng tnabahen yu anì hol ye sfulung ebè yem Ngaen Dyisas Kdays, yem gunu tekuy mogot.

# Dyisas Kdays Kmukum Yem Kdéen

## Hdom 14:10

Ne duhen yó, hol bê tekuy abay tendok nmò kem dumu te hemtahu, duhen ke tô hennê te lu. Kaem angat kdéen tekuy he gotu mdà bê solu Dwata, ne angat knukumen tekuy.

## Matyu 25:32

Angat tódô kdéen tau bê klamangen benwu angat gotu stifun bê soluhen, ne angat sentólóngen lu. Lumu kmò kestólóngen kul, lumun yem tau semgyok ógóf, gel sentólóngen yó kem kambing bê yó kem ubiha.

## Dyan 5:22

Sotuhen, là kô Mà du yem angat kmukum kem tau. Okóm deng sigang Dwata tahu ne yem angat kkukumu kdéen tau.

## Hdom 2:16

Sotu nù lem yem tulón lemwót bê Dwata gel nwitu, duhen yem angat kehkukum Dwata ke Dyisas Kdays kdéen tau. Angat knukumen yó kem deng tehe nmò le, balù yó kem tehe gel gebnos.

## 2 Timuti 4:1

Mon Fol mò ke Timuti, Nim bud hlolou kóm ni, tngón Dwata ne tngón Kdays Dyisas. Du yem angat kmukum yó kem kdéen tau tolo mowil senged se yó kem deng tehe matay. Yó gunuhu mon du mò kóm nim monu ni, abay se angat bud semfulék edini talak tonok Dyisas nen e nogot yem klamangen benwu.

## Nmò Yó Kem Hógów Dyisas 10:42

Yó hol hmoen kum, mon Fitel, fen hegلالag me elem blóng yó kem tau yem kun tulón. Yó hol gel tulón me, duhen Dyisas se yem deng nélék Dwata mò angat hkukumen kdéen tau ke sok bud semfulék edini. Angat gotu hdaen lu bê soluhen yó kem kdéen tau tolo mowil, dalang se yó kem kdéen tau deng matay.

# Tek Són Bè Dyisas Gunù Gewà

## Dyan 10:9

Ou se yem henged bak tikeb, mon Dyisas. Yó se mlan bè yem bak tikeb yó, laen kô dù knikoen abay se ou yem semgyok du. Kihu ke móyô hewà ne e mótop, ne bud mulék elem kukuben, laen dù kô knikoen.

## Dyan 14:6

Bud mon Dyisas se, Ou se lan ye ebè Dwata, ne ou se yem hol tahu duhen mó gunu ye hemtahu. Béléu se gunu ye gmuta klowil laen dù sónen. Laen dù gógów ebè Mâ ke là mlanen béléu.

## Dyan 8:24

Mon Dyisas mó kul, Yó gunuhu mon du mó kuy sana tolo kbô ye du he salà ye sok ye mlef, abay se là hentahu ye du yem khógów Mâ do edini. Yó gunum mon, sok ye mlef sana tolo knuen ta ye salà ye.

## Hiblu 5:9

Yem kton Dwata yem deng kgulit yem Ngaen, yó gunun hlan du béléen yem kegewà tekuy gu lem hatay. Kdéen tau himón béléen gotu lenwaen lu. Yó blayen kul yem klowil laen dù sónen.

## Hiblu 7:25

Duhen yó, ke hlan te bè Dyisas yem kógów te ebè Dwata, hol là gbeken du ke là lenwaen tekuy gu lem hatay. Lemwót bè yem kun là katay, yó gunun là skó yem knihen tóbóng bè Dwata bélê tekuy.

## Nmò Yó Kem Hógów Dyisas 4:12

Laen kô dù dumu tau talak tonok, mon Fitel, ke gunu tekuy gmuta du yem klowil laen dù sónen. Tek són du yem Dyisas Kdays lemwót bè Nesadit yem gunu tekuy gewà gu lem salà tekuy. Yó se yem udél Fitel ebélê le.

## Tek Són Bè Dyisas Gunù Gewà

Duhen yó, hol tódô senflós ye dmoyón ke Dwata, yakà deng henbalingen kuy kem kun tau knuun bè yem kun benwu nogot. Ke hningunu yó kem tau kun nogot Dwata, lumun ke nù le lem layag. Ne tódô kdê le angat gotu benlay Dwata ólól. Deng lenwà Dwata tu gu lem yem kun kogot Seitan. Ke hningun te yó kem tau nogot Seitan, lumun ke seflós le nù lem kifu. Bede deng nili Dwata tu ne kut elem yem kun kogot, yem hol tek són kun Ngà ali kenbong nawa. Yó sem Ngaen yó yem deng msok tekuy lem hatay. Lemwót bè yem ksoken tekuy yó, yó se gunu Dwata hmifót yó kem salà tekuy. —Kulasi 1:12-14

Ni se yem hol hendufu, mon Dyisas, new e senolò lu yó kem tau deng tlas anì bud glolò le yem tahu bótóng lan, anì là gehlós le elem tafak Dwata. —Luk 19:10

Hlan Dwata bè Kdays Dyisas yem lomi klowil blayen tekuy ni. Bud benlay Dwata tekuy ketngón snéen mlan bè Kdays. Ne lemwót bè yem deng nmò Kdays bélê tekuy, yó gunun tedeng kton Dwata tekuy ne gunu tekuy baling mólós. Ne yem fen msok tekuy gu lem hatay, bud Kdays se. —1 Kudin 1:30

Deng fen hamà Dyisas yem kun klowil bélê tekuy anì lenwaen tekuy bè kdéen sidek gunu te gel geskét, anì kóhen ke wen belenen yem knawa tekuy. Ne henbalingen tekuy kem kun tau anì tódô gotu nawa tekuy mò du yem nmò hyu. —Titus 2:14

Ne omin le gotu segeng semngal yem sngal lomi, yem laen deng hnikót semngal du he. Yó utóm yem sngal le, monen, Són u se yem knuun bang ma yem sulat lenulun ne mkó yó kem dketen, yakà uu du yem deng tehe hnatay le. Són yem kóm litô gembek msok yem kentihen but tau bè klamangen benwu. Deng nsoken lu mò kun nfun Dwata.

— Són Bok Snulat Dyan 5:9

# **Yem Kegewà Mlan Bè Litô Dyisas**

## **Hdom 5:9**

Deng fen hamà Dyisas yem kun litô anì baling kuy tedeng bè solu Dwata. Ke yó se nmoen bélê tekuy igò tekuy sem alì gemsalà, milud he któbóngen tekuy ni kmoen ni, abay se deng tedeng ne ktonen tekuy. Hol dohò yem angat kehewaen tekuy gu lem tafak Dwata.

## **1 Dyan 1:7**

Okóm ke deng gotu tebel te lu yó kem sidek gel nmò te, lumun ke deng te mili elem yem layag gunuhé gel nù Dwata. Ne yó he klinggel kesfulung te bè yó kem dumu te hemtahu. Ne yem litô yem Ngà Dwata bè yem tehe le ktutuk le du, yó se fen tendo mkó du bélê tekuy yó kem kdê salà gel gmò te.

## **1 Fitel 1:18, 19**

Deng tngón te yem tehe ksok Dwata kut mò gunun lemwà kut bè yó kem tehe gel nmò te, yem nmò laen dù gunun egefen tehe dnalang te bè yó kem tehe fù te. Bè ksoken kut Dwata, sundu yó du kem kimu wen sónen soken tekuy, lumun filak. Okóm yó soken tekuy, duhen yem litô Kdays, yem litô laen dù gembek mayad du. Yem Kdays, hol lumun yem ubiha gel hnatai le mò dsù le bè Dwata. Yem ubiha gel dsù le sal gel nélék le yem hol hyu. Hol lumun yó se Kdays, laen kô dù sidek ton le béléen.

## **Hiblu 9:14**

Ke wen muhen yem kul litô yó kem ógof, milud he kwen muhen yem kun litô Kdays. Abay se balù udì ke wen sidek tonem béléen yó dum kun. Tódò hamaen yem kun klowil bè kem tau mò dsuen ebè Dwata. Yó se hol hentóbóngen bè Tulus Dwata yem kedsuen yó. Yem litô dsuen, gbeken mkó du bélê tekuy yem sidek gel hemblat kut, yem sidek angat mit tekuy elem hatay. Ke deng kóhen bélê tekuy tu kem tu, gbek te ne mò du yem kun hmò kut Dwata. Yem Dwata monu ni, du se yem hol tahu Dwata laen dù tul katayen.

## Mlan Bè Kehtahu Bè Dyisas Kdays Yem Kegewà

Bong tahu se nim ni. Tódô lemwót bè kun tóbóng Dwata yem gunu te gewà gu lem hatay lan te hemtahu bè Kdays. Là kô wen kut kegbek tódô lemwà kut knù gu lem hatay, tódô lemwót bè yem kun nmò Dwata yem kegewà te yó. Laen kô bang gunu te hegmón du nim ni, abay se là kóen lemwót bè yem gel nmò te gunu te gmuta du.

—Fisus 2:8, 9

Duhen ni, là bud tekuy sfohon ke Dwata ne abay se wen Dyisas Kdays yem gunu tekuy mogot fen semfyu tekuy. Deng baling tedeng kton Dwata tekuy ne, mlan bè yem kehtahu tekuy bè Dyisas. —Hdom 5:1

Ke deng tekuy hemtahu bè Kdays, deng tedeng ne kton Dwata kut. Laen kô muhen bélê te kut yem ilô gel nmò le bè lówó logi yó. Senged se ke wen, duhen ke là. Yó dé ali bong muhen bélê te, duhen yem kehtahu te bè Kdays. Ne yem kehtahu tekuy, yó hol gunun gfan bè yem kesbong nawa. —Glaysa 5:6

Ke deng te baling ngà Dwata, anien ke wen smindil kut, laen kô gmò le bélê te. Yó se gunun laen dù gmò le bélê te lan te deng hemtahu bè Dyisas. —1 Dyan 5:4

Ni gunuhu smulat du ni kem snulatu ni anì hentahu ye se kuy yem Dyisas hol Ngà Dwata. Du se yem Kdays deng nélék Dwata mò hkamalen yem clamangen. Lemwót bè yem kehtahu ye du nim ni, yó se gunu ye gmuta klowil laen sónen. —Dyan 20:31

Ne mon le se mò ke Dyisas, Tedu se tò nmò me du anì gmò me yem kun kóyô Dwata? Ne bnalà Dyisas se lu, monen, Ni hol kóyô Dwata bélê ye ke hentahu ye o, yem deng hógów Dwata elem blóng ye. —Dyan 6:28, 29

# **Yem Kkodu Dwata**

## **Sam 103:11**

Ke hningunu yem ali nawa Dwata yo kem tau gel mimon du, hol lumun to yem longit kbongan. La kô gbekem hmingun du.

## **Sam 103:17**

Okom yem kun kbong nawa Dwata yo kem tau gel mimon du, laen kô du sônen, ne la se monolen. Senged se angat kmò Dwata be yo kem bud lugod le ke la mkóhen be nawa le yem kun hlau ne ke tendo nimon le.

## **Mika 7:18**

Laen kô dumu dwata semnged kóm, Dwata. Tek són uu yem gel hmifót salà yo kem tauhem du tebel. La kô henfuhem du yem kebutem kul, mom hyu nawahem ke wen gunum hegfan du yem nawahem ebélé le.

## **Sam 108:4**

Yem kbong nawahem do, Dwata, ne yem la kili nawahem tmóbóng do, udì tonok ne udì longit.

## **Laméntéysun 3:22, 23**

Tódô lemwót be yem tey kbong nawa Dwata kut gunù tekuy la gotu meglà, abay se tódô seflós yem kkoduhem tekuy ket haya. La kóen ne e mili nawahen bélê tekuy.

## **Titus 3:5**

Sundu kô be yem hyu kmò te gunun lemwa kut, okom tódô lemwót be yem kkodu Dwata kut. Lumun ke denyohen tu yem Tulus Dwata. Yem kedyohen kut yo, yo se yem kehbalingen kut ngà Dwata, ne yo se kehlomihen kut.

# Kesgalu Dwata Tekuy Ebéléen

Matyu 11:28

Yu kem tau alì miteg lemwót bè yem alì sidek keblat yem nbô ye, mógów ye ebéléu dé, mon Dyisas, anì fen henwósu bélê ye yem blat nwit ye.

Isaya 55:1

Wó kem meeng, géhél ye edini ne, ne ye e minum él. Ne yó kem tau bitil laen dù bang bli le, géhél ye edini, tódô ye ne e ma mò ken ye. Tódô ye ne e ma yem mò gunun mgel lem lówó ye ne mò gunun maan nawa ye. Laen kô blihen nim ni, tódô lasam kuy.

Dyan 7:37

Bè yem mò ken le yó, alì bong muhen bélê le yem hol són kdaw. Mdà lem blóng yó kem tau Dyisas, hgelen udélen, monen, Yó se tau meeng mógów ebéléu dé ne e minum.

Són Bok Snulat Dyan 22:17

Yó udél yem Tulus Dwata dalang se yó kem tau hemtahu bè Dyisas, mon le, Géhél ye ne. Ne yem tau mungol du bud monen se kun, Géhél ye ne. Yem tau meeng tódô géhél edini ne, nen e minum bè yem él hlowil tau. Yem él ni là kô tógón benli du.

Isaya 1:18

Géhél ye kun, mon Dwata, na kuy sentulón yó kem salà ye. Baluen he ke lumun khulóen klikam yem salà ye, botong gbeku hbukay du lumun lem kdungon.

# Là Kô Kdéen Du Tau Ngà Dwata

## 1 Dyan 3:10

Yó ilô te du ke deng baling kun ngà Dwata yem tau ke deng tedeng kmoen, ne ke kenbong nawahen kem dumuhen hemtahu. Fen là yó kem kun tau Seitan.

## Hdom 8:14, 15

Yó kem kdéen tau tendo halak bè Tulus Dwata, lu se hol tahu kun ngà Dwata. Yem kehedem deng blay Dwata kut bè kehtahu te, là kô lumun du yem kul kehedem yó kem tau klifen alì dê knikò le bè yó kem tau mfun kul. Okóm yó dum kut, deng tódô blay Dwata tekuy yem kehedem lumun kehedem yem ngà ebè maen, abay se deng ngaen tu Dwata. Là myak te tmaba du Mà.

## Flifay 2:15

Yem gunun hyu ke lumun ni kmò ye abay se yu se kem kun ngà Dwata, ne hyu ke laen dù bang gunu le gemsanil kuy kem tau, ne ke laen dù belenen bè yem kmò knawa ye snéen. Ne hyu ke laen dù bolen sidek yem gel kmò ye balù yem knù ye lem blóng kem tau sigol, kem tau gel heswì le yem tedeng. Ke hningun te yem kuy klowil, hol lumun ke blotik mnóng lem kifu.

## 2 Kudin 6:17, 18

Duhen yó, mon Dwata, hol ye hlayuk bè yó kem hemtahu bè dwata kéng. Htólóng ye yem kuy klan. Hol bè ye abay bud nmò yem sidek. Ke nimón ye ni, mon Dwata, tey angat khódóhu kuy. Ou se baling Mà ye, ne angat ye baling dou ngà. Ni se udél yem Dwata laen dù là gbeken du.

## Dyan 1:12

Okóm kdê yó kem tau hemmójô ke Dyisas lemwót bè yem kehtahu le béléen, gotu benlayen lu kwalis baling ngà Dwata.

# **Yem Mon Dwata Gbak Bè Yem Ninum Lemengel**

## **Glasya 5:19-21**

Tey mahil dilô yó kem tau són yem kul knóyô gunu le galak. Sal le gel mò samuk. Là mólós kehedem le. Laen dù afas nawa le. Ne lel le hemtahu bè dwata kéng, ne tey ksalig le bè imò le. Són mò le yem sfohon ne sfatay. Gel le sélés nawa. Ne dê gunu le sefebut. Són henlom nawa le kul knóyô. Tey alì mahil mesgólól kehedem le. Yó mò kul, gel nóbô le yem ton le bè kem dumu le. Ne tey gel kehlengel le snéen, efet dê ne yó kem sidek nmò le. Bong dê he dumuhen gel nmò le lumun ni kem ni. Bud nulitu bélê ye yem deng tehe eles tulónu kuy. Yó kem tau gel mò du ni kem ni, là kô le ne e gmung bè yem kun kogot tau Dwata.

## **Isaya 5:11**

Angat tey ktifik Dwata kul yó kem tau gel henmung minum hlafulus ne hlengel. Balù sóol buteng sana alì gel kehlengel le.

## **Hdom 13:13, 14**

Nmò te dé yem nmò segtón bè yem kul kmò yó kem tau nù lem layag. Sundu yó du nmoen yem tau nù lem layag ke gel le segduf hlengel, mò lan le mò yó kem dumu nmò hemyak knù. Ne sotun, là kô hendem le du kul yem mò samuk, ne yem mit sgés, ne yem mófô yem ton le bè kdumu le. Yó dé nmò te, hol dnalang te yem kun kmò Dyisas Kdays, yem gunu tekuy mogot. Ne bê te abay tódô nimón yó kem sidek knóyô lówó te.

## **Kem Tolok Selumun 23:31, 32**

Béi gbóy du yem ninum lemengel balù nù ktiloben lem basù, anien ke mnóm kehlohem du. Ke henlelem minum, lumun ke ulal malas deng mékét kóm.

# Là Kóen Kójow Balù Nù Kehgulit Tau

Matyu 22:37, 38

Bnalà Dyisas se, monen, Hotuhem nawahem ebè Dwata, yakà du du gunum mogot. Hotuhem gelem mimón du. Són yem kun kójô hol hendemem. Yó se yem hol tanay hlau Dwata, yem alì bong muhen bè kdéen.

Malk 10:17-22

... Tey hyu yem gel ktolokem, ne tey hyu yem gel kmoem. Wen snólóku béléem, monen. Boluy se tò nmou du anì gutahu yem klowil laen dù sónen? Ne mon Dyisas se mò du, Moen de ke monem mò dou, Tey hyu kmoem? Laen kô dù dumu hyu kmoen, tek són Dwata. Ke hendeenem yem klowil laen dù sónen, mon Dyisas, hol loloem yó kem hlau Dwata deng tngónem, yem monen, Béi monok. Béi mò samuk. Béi mnagaw. Béi mò kéng. Béi lemugi. Nadatem kem tuhahem. Ne mon yem tau smólók ke Dyisas yó koni, monen, Laen kô deng gel nuléhu du se dou ni kem hlau Dwata ni, tódô mbut bè yem hanà kegenu ngà. Yem ketngel Dyisas ebéléen tey klayuk nawahen du, monen mò du, Sotu he duen tolo gunuhem là deng sikof. Muléki ne, hbaluem yó kem kdê nù béléem, ne blayem tu kem tau awam, ne angat wen kendengenem bè longit. Lemwót kóm, loloem o. Timbow gungolen yem mon Dyisas mò du ni, tódô dilô lem uyóhen yem tey sidek keblat nawahen, ne tódô mulék igò yem tey sidek kegnómen du. Abay se ngalihen yem tey kendengenen yem tau yó.

Kem Tolok Selumun 16:25

Wen se yem lan nójô lolò tau lumun ke hyu yem kun kehedem du, bede bè sónen, mom matay du.

# Bê Abay Heksukat

## Fisus 5:6

Bê ye abay gtondo bê yó kem tau beyen mò tulón laen lem. Là kô wen klikò le mò du yem sidek. Nénég ye he angat tey ktifik Dwata kul yó kem tau smonol du yó kem kenbéen.

## 1 Kudin 6:9, 10

Deng hunù tngón ye snéen, là kóen gmung bê yem kun kogot Dwata yem tau là tedeng nmoen. Béen tólóng kehedem ye du nim ni. Là kóen gmung bê yem kun kogot Dwata yó kem tau gel mò samuk, ne yó kem tau hemtahu bê dwata kéng, ne yó kem tau mdà yehen, ne yó kem tau deng mom senwì le yem kmò kesyehen, syehen honon logi ne libun syehen honon lu. Ne yó kem tau mnagaw, là kô le gmung bê kun kogot Dwata, ne yó kem tau seglom ne yó kem tau gel hlengel, ne yó kem tau gel sidek kbak le ebè kem dumu le.

## Dyim 1:22

Bê ye abay olo tô hmungol du yem udél Dwata, okóm hol nimón ye snéen. Ke olo ye tô hmungol du, ten-geed ye tmundo knù abay se là kô ye gewà gu lem hatay ke olo ye tô hmungol du.

## 1 Dyan 3:7, 8a

Yó gunun mon, kem ngà, hol ye hfulung hedem anì là mom glolò ye du yem sekban. Ke tedeng nmò yem tau, yó se gunun gfan yem deng kehbaling Dwata du tau tedeng, abay se dnalangen yem tedeng nmò Dyisas. Yem tau són moen mò salà, du se kun tau Seitan, yakà Seitan du hol gna mò salà lemwót bê kbuten.

## Glasya 6:3

Ke tódô salig te kut knù kembê salà, neet kô gbek te. Deng mom olo te tmundug knù te.

# **Yem Ulék Yem Salà Hatay**

## **Hdom 5:12**

Bè hol kbuten tek sotu tau gunun mbut yem salà, duhen Adam. Ne lemwót bè salà, yó gunun wen hatay. Ne yó gunun lemwót matay kdéen tau abay se gotu le gbót mò salà.

## **Dyim 1:14-15**

Yem tau ke henbeyenen yó kem kun knóyô là hyuhen, yó se mgoy du anì gsindil. Ngangen ne efet gmoen, yó ne kbalingen salà. Ne ke deng hunù ne kmoen salà yem tau, yó se kemteng du elem hatay laen dù sónen.

## **Hdom 8:5-6**

Yó kem tau galak bè kul knóyô, són yó ne hendem ktes le, són yó kem kul knóyô. Tek sotu nefeten tum ktes le tu, són tafak laen dù sónen. Okóm yó kem tau halak bè Tulus Dwata, són mò le hemdem lemolò yem kóyô Dwata bélè le. Ne yó nefeten baling menek nawa le lemwót bè yem là bud kesfohon le ke Dwata. Ne guta le kul yem klowil angat hlós henek bè Dwata efet laen dù sónen.

## **Isikyél 18:20**

Yem tau mò sidek, du angat tnafak Dwata. Yem ngà, laen kô kun du yem salà maen, dalang se yem maen, laen kô kun du yem salà ngaen. Yem tau tedeng kmoen, angat gutahen ofolen bè yem ktedengen. Dalang se yem tau là tedeng kmoen, angat gutahen se ofolen mò du yem là ktedengen.

## **Luk 15:32**

Bê te tô là hligal. Abay se yem twolihem, monen, lumun ke deng matay, okóm deng bud mowil. Deng tehe hlana, okóm deng bud mulék.

## **Kem Tolok Selumun 11:19**

Yem tau eles hnuen bè nawahen mò du yem tedeng, angat gutahen yem klowil laen sónen. Bede yem tau hemlel mò sidek, angat hlós elem hatay laen dù sónen.

# Deng Matù Dyisas Bè Hatay

Luk 7:14, 15a

Omin Dyisas móglé ebélê le, ne nnoken ta yem mlef yó, ne na le se htengen mdà yó kem tau semtihang du. Mon Dyisas mò yem deng mlef yó, E Woli, btiki. Ne tahu se. Tódô heboluk myón yem logi yó, ne mudél ebélê le.

Dyan 11:43, 44

Timbow deng yem kni Dyisas yó koni, ominen tmaba, monen, E Lesadus, hewai. Tódô sen-gengen se hewà Lesadus gu lem lebengen, sana tolo knuen bè lówóhen yó kem nes tehe baus le du, dalang se yem tólóng nes baus le bè kuluhen. Omin Dyisas mon du mò kul, Kó ye dé tum nes bausen anì hyu kógówen.

Dyan 10:17, 18

Ne bud mon Dyisas, Tey kbong nawahen do Mà abay se tódô lemwót bè dou kóyô hamà du yem dou klowil bè yó kem tau. Okóm angat bud gutahu snéen yem klowilu hamau bélê le yó. Bè yem khamau klowilu yó, là kóen lemwót bè tau, okóm tódô lemwót béléu. Wen kwalisu hamà du yem dou klowil, ne wen se bud kwalisu bud ma du snéen. Ni se yem ne e hmò MÀ dou.

Són Bok Snulat Dyan 1:18

Mon Dyisas, Ou se yem laen dù tul katayen. Balù yem deng tehe khatay le do, okóm ni denge bud mowil, laen dù bud sónen ne yem dou klowil. Ou se yem wen kfasangen mogot hatay. Dalang se yem benwu boluyen Hidis, yem benwu hlun gunun stifun balu yó kem tau deng matay, ou se yem mogot du.

# **Yó Kem Kun Hlau Dwata**

**Dutelonomi 5:7-21**

**Hol bê ye abay hemtahu bê yó kem dwata kéng.**

**Són ou gunu ye hemtahu. Bê ye abay nmò se yó kem lennged nmò skél bê yó kem ton ye bê longit, duhen ke bê yó kem ton ye talak tonok, dalang se yó kem ton ye lem él. Bê ye abay mtud bukol bê solu yó kem dwata lenbù nmò, abay se ou se yem Dwata gunu ye mogot. . . .**

**Bê ye abay lakit yem dou boluy ke wen belenen sidek yem gel nmò ye. Angat tnafaku yem tau mò du yem yó.**

**Bê ye abay klifót hegnù bê yem kdaw deng htólóngu. Ket nem kdaw ye mò nmò . . . .**

**Hol nadat ye mà ye ne yê ye lumun yem deng hlauhu kuy. . . .**

**Bê ye abay monok.**

**Bê ye abay ndà yehen ye.**

**Bê ye abay mnagaw.**

**Bê ye abay tódô lenbù dnelem kem dumu ye tau.**

**Bê ye nalaw yehen kem dumu ye. Bê ye nóbô gunù kem dumu ye, duhen tonoken ne kem tau mò nmò bélê le ne yó kem ógófen, balù kihu dumu kimu ton ye bélê le.**

# Là Kói Gehebnos Bè Dwata

Dyob 34:21, 22

Gotu ton Dwata yem kun kmò tau. Laen kô dù gunun kmifu ke tò gunun hebnos yem tau gemsalà ke là ton Dwata du.

Sam 139:8 ne 12

Laen kô dù gunuhu ekól, Dwata, ke là elesi henek béléu. Ke mógrówe edyó bè longit, elesi nù bè yó se kóm. Ke hlilile bè kul benwu yó kem tau matay, elesi nù bè yó se kóm. Ke tóe hebnos gunun kmifu, yem kifu yó lumun talak kemdaw béléem. Yem kkifuhéne yem klayagen, senged béléem.

Yedemaya 23:24

Mon Dwata, Laen kô tau gembek hles bè gunun gebnos ke là angat tonu du. Abay se laen kô dù gunuhu là nù, monen. Nue bè longit, ne nue bè tonok snéen.

Kem Tolok Selumun 15:3

Laen dù là ton Dwata du. Tendo tnanuden tekuy ke hyu nmò tekuy duhen ke sidek.

Luk 8:17

Laen kô dù bè yó kem gel hningunu, mon Dyisas, ke là angat gotu getnef kem tau du lanen. Yem là gfanen nim kmoen ni, angat gfan he.

# **Yem Tafak Laen Sónen Yó Kem Là Hemtahuhen**

**Matyu 13:41, 42**

**Angat dók yem tehe niba le Ngà Tau yó kem hógówen gu bè longit anì gotu kó le yó kem kdéen sidek gel kemteng tau elem salà. Dalang se yó kem tau gel mò sidek gotu kó le lu. Gotu tudà le lu elem lanaw ofi. Ditu gunu le heslaf demumu mkik.**

**Matyu 18:8**

**Yó gunum mon, mon Dyisas, ke doli sigelem duhen ke doli tihem mit kóm mò salà, hyu ke tódô kenlengem, ne botem. Mom hyu béléem ke lana béléem doli tihem ne doli sigelem syan ke gutahem yem klowil laen dù sónen. Laen kô ofolem du yem lewu tihem ne lewu sigelem ke deng mom tudà le u elem lanaw ofi.**

**2 Fitel 3:7**

**Ne angat bud lemwót bè udél Dwata snéen gunun angat gemlà yem tonok ne longit gel ton tekuy ni kmoen ni, bede ofi ne tles angat hógówen mò lemsón du. Angat tey sidek keglaen kul yó kem tau gel mò sidek, són nangaten yem kdaw kkukumen kul.**

**Sam 9:17**

**Angat hlós elem hatay laen dù sónen yó kem tau gel mò sidek, ne yó kem kdéen tau kembê ke Dwata.**

**Matyu 25:46**

**Duhen yó, mon Dyisas, tódô le gotu hlós elem yem tafak Dwata laen dù sónen. Okóm yó kem tau hyu kmò le, guta le yem klowil laen dù sónen.**

# **Yem Angat Kkukum Dwata**

**Nmò Yó Kem Hógów Dyisas 17:31**

Yakà dengen mdengen buteng Dwata hdà kul bè soluhén yó kem kdéen tau. Ne deng wen tau nélék Dwata mò hkukumen kul, ne tey tedeng yem kkukumen. Wen ilô tekuy du yem tau deng nélék Dwata yó. Yó ilóen, duhen yem deng kebtik Dwata du gu lem hatay.

**2 Fitel 2:9**

Bè nim kdéen tulónu kuy ni koni gunu tekuy mton du yem tey khulung Dwata. Gel wen lanen lemwà yó kem kun tau ke wen gel gfà le. Ne bè yó kem tau gel mò sidek, sal gel tnafaken lu, bede nangaten yem kdaw angat kkukumen tau mò gunun hemeed tmafak kul.

**1 Dyan 4:17**

Ke tódô ket du yem kbong nawa te kem dumu te tau, là kô te ne e likò bè Dwata bè yem kdaw angat kehdaen tekuy bè soluhén. Yó se gunu te là likò abay se deng gbót te ne yem kun nawa ebè tau.

**Hiblu 9:27**

Deng tehe olu Dwata kul yó kem tau yem angat katay le. Ne tahu se yó, sal matay yem tau. Na olon sulék mowil ne olon sulék se matay. Kogolen bè yó, gotu hdà Dwata lu bè soluhén anì knukumen lu.

**2 Kudin 5:10**

Kaem angat tekuy gotu mdà bè solu Kdays hulin kdaw. Angat gotu knukumen tekuy ket tekuy na sotu. Tódô ket tau angat gmuta du balà yem tehe deng kun nmò ke hyu duhen ke là.

**Hdom 14:12**

Ne yó se bè yem hsulat Dwata yó koni gunu te temngón du yem angat kehdà Dwata tekuy bè soluhén. Tódô angat htulónen tekuy kdê yó kem deng tehe nmò te kegen te nù te tonok.

# **Yem Tóbóng Dyisas Kdays**

## **Hdom 5:15**

Okóm là skélen yem guta tau bélê le. Yó guta tau bè Adam, duhen hatay, lan tau gembót yem kegsalaen. Okóm alì hyu yem guta tau bè Dyisas Kdays, duhen klowil laen dù sónen. Tódô lemwót bè yem któbóng Dwata tekuy gunu tekuy gmuta du yem klowil yó, là kô nen e hbayad du tekuy. Tek sotu tau gunun lemwót matay kdéen tau. Ne tek sotu tau snéen gunu tekuy gmuta du yem klowil laen dù sónen.

## **Hdom 9:16**

Yó gunum mon, là kóen lemwót bè kun kójô yem tau duhen bè kun nmò gunun gmuta yem kkodu Dwata du. Okóm tódô lemwót bè yem kun kójô Dwata kmodu du.

## **1 Fitel 5:5b**

...Bong hohon Dwata yó kem tau hton salù. Bede yó tnóbóngen yem tau gel heglaan le knù le bè kem dumu le.

## **2 Kudin 8:9**

Deng tngón ye se yem alì nawahen ebè tau yem ogot tekuy Dyisas Kdays. Gloken gemtagak yem tey kun benwu mdengen bè longit ne e baling tau élél te tonok. Yó gunun mò du yem yó mò lanen tmóbóng tekuy kem tau tonok anì baling wen kendengen tekuy ditu bè longit hulin kdaw.

## **2 Kudin 9:15**

Yó ne, hol dójón tekuy dé Dwata bè yem tey któbóngen tekuy, yem tóbóng là gbek te hmingun du. Tódô kem blayen tekuy yem hol tek són kun Ngà.

## **Nmó Yó Kem Hógów Dyisas 4:33**

Tey gemon yem gel tulón yó kem sfolò lewu bè yem ktulón le du yem deng bud kbtik Dyisas gu lem hatay. Ne ya tey tendo któbóng Dwata kul.

# **Kehegsel**

## **Nmò Yó Kem Hógów Dyisas 17:30**

Tehe yu ekni, mon Fol, là deng senolò Dwata du he yem là kesetngón tau béléen. Okóm ni kmoen ni, deng wen lanen hetngón du yó kem tau anì hegsel le, ne tenles le kmò le.

## **Luk 13:3**

Sundu kô yó du yem klanen. Yó tódô tulónu kuy, mon Dyisas, ke là eles ye hegsel ne ke là eles kó ye du yem sidek gel nmò ye, angat ye gógów elem tafak laen dù sónen snéen kuy.

## **Nmò Yó Kem Hógów Dyisas 3:19**

Duhen yó, mon Fitel, hegsel ye ne bè yem sidek deng nmò ye. Semfulék ye ebè Dwata dé anì kóhen ta ye yó kem salà ye.

## **Nmò Yó Kem Hógów Dyisas 2:38**

Mon Fitel se mò kul, monen, Hegsel ye, ne kleng ye du te bótóng ne yó kem sidek deng gel nmò ye. Ne hhabitays ye lemwót bè yem deng kehtahu ye ke Dyisas Kdays. Lemwót bè yem kehtahu ye, yó se gunu Dwata hmifót yó kem salà ye, ne angat hlusen ebélè ye yem Tulusen.

## **2 Kudin 7:10**

Tey bong hyu se yem kegbeng lem lemwót bè Dwata abay se niten tu hegsel anì guta te yem klowil laen dù sónen. Laen kô dù gunu te gsel du yem keblat nawa blay Dwata yó. Okóm yem kul keblat nawa yó kem tau là hemtahuhen, niten lu elem hatay laen dù sónen abay se là hegsel le.

## **Matyu 3:2**

Hegsel ye ne, ne tenles ye kmò ye, yakà móyónen hto ne yem buteng Dwata mogot tau.

# **Yem Kehlifót Salà**

## **Matyu 6:14**

**Ke hnifót ye salà yó kem gamsalà bélê ye, mon Dyisas, hnifót yem Mà ye bè longit se yem kuy salà.**

## **Isikyél 18:21**

**Bede ke kóhen yem gunun là tedeng yem tau gel mò sidek, ne ke tendo nimónen yem dou hlau, ne ke nmoen yem hyu ne yem tedeng, là kóen angat megtafak, okóm angat wen kun klowil laen dù sónen.**

## **Són Bok Snulat Dyan 3:20**

**Mon Dyisas, Ngem elese gel mdà tmaba snolu aut ye. Ke wen tau hmungol du yem tabahu yó, ne ke hotunen o eta, motune se. Ne segbóte mken béléen bè yó.**

## **Isaya 55:7**

**Yem tau gel mò sidek, hol kóhen yem sidek yó. Ne yem tau sidek kehedemen yó, géhél kóhen. Géhél mulék ebéléu dé, mon Dwata, anì tles nù béléen yem kkoduhu du, ne anì là bud snolou du béléen yem sidek deng nmoen.**

## **Nmò Yó Kem Hógów Dyisas 5:31**

**Ni kmoen ni deng hyón Dwata Dyisas fi bè kwananen ditu bè longit, ne tey kehegetahen du. Ne du deng nmò Dwata mò gunu tekuy kmulu. Béléen gunu Dwata hlan du yem kguta tekuy klowil laen dù sónen. Ne hlan Dwata béléen snéen yem kehlifóten salà yó kem kdéen tau Sdaél ke hegsel le.**

## **Malk 2:5**

**Tikóng ton Dyisas yem alì kehtahu le béléen yó kem tau mit du, yó gunun tódô mon du bè yem tau là buden dmemen doli lówóhen yó koni, E Wè, hnifótú ne yó kem salaem.**

# Bê Te Ali Hendem Yó Kem Nù Lem Benwu

## Titus 2:11, 12

Bè yem kmò kehwà Dwata yó kem kdéen tau gu lem hatay, yó gunun hegfan du yem któbóngen kul. Yó nwa te bë nawa te bë yem któbóng Dwata tekuy yó, bê kuy bud nmò yem kun kenbê Dwata. Bê te abay geskét du yó kem gel kenbeyen nawa. Hfulung te mit yem kut knawa, hebtol te knawa te, ne nmò te yem gunu te gulit ebè Dwata.

## Kulasi 3:2

Béen olo són du nawa te yem kdéen kimu nù te tonok. Tu dé hol gunuhé nù nawa te tum kimu nù bë longit.

## Fisus 5:11

Bê te abay genbóy kul kmò yó kem tau là wen kehtahu le bë Dwata. Nmò yó kem tau nù lem gunun kmifu yem kul kmò yó, yakem wen se gunun ekól. Fen hentedeng te yem kut kmò anì dilô le gunun sigol yem kul.

## Isaya 1:16

Yó bud udél Dwata ebélê ye, monen, Là kóen mólós yem ktonu kuy. Hgifat ye dé, dyo ye. Hol kó ye yem sidek tonu bélê ye, bê ye abay bud mò sfuhé.

## 1 Dyan 2:15, 16

Ne ni tulónu kuy ni, bê te abay genmung nawa kut nim benwu ni, ne yó kem dê gel kenbeyen nawa ton lemen. Abay se ke hluun te bë yó yem kehedem te, là kô bong nawa te du tum Mâ tekuy bë longit. Yó se gel kemteng kut mò sidek, yó kem dê knóyô lówó te ne yó kem dê ton mata te, ne yó kem dê gunu te hdatù. Kdê ni kem ni, là kóen lemwót bë Dwata. Sal lemwót bë knóyô tau te tonok.

# Kehbaling Te Ngà Dwata

## Isikyél 36:26

Mon Dwata, Angat benlayu yu yem lomi nawa ne yem lomi kehedem. Angat kóhu bélé ye yem alì kbong gel ye, ne tlesu du yem nawa mimón.

## 1 Dyan 2:29

Tngón ye se kóó, yem Dyisas, tey tedeng kmoen. Ne tngón ye snéen ke deng hol tahu tedeng kmoen yem tau, du se yem tau deng tahu baling ngà Dwata abay se deng dnalangen yem kun kmò Dyisas.

## 2 Kudin 5:17

Duhen yó, ke deng hemtahu bè Kdays yem tau, baling lomi ne mò kmoen. Kdè yó kem tehe gna kehedemen teganay deng lana, ne baling lomi ne bud tlesen.

## 1 Dyan 5:18

Deng tngón tekuy se ke deng baling ngà Dwata yem tau, là kô senflósen du mò salà, abay se Dyisas yem Ngà Dwata fen tendo mofin du. Yó gunun là bud gemmò béléen Seitan.

## Dyan 3:3

Bnalà Dyisas se, monen, Tódô tulónu kóm ktahuhé, là kóén gmung bè kogot Dwata tau yem tau ke là nen ne bud hlomi sut.

## 1 Fitel 1:23

Deng kuy ngà Dwata ne, ne deng tngón tekuy ni kmoen ni yem klowil laen dù sónen. Là kóén lemwót bè kul klowil kem tuha tekuy yem klowil yó abay se sal gel wen sónen yem kul klowil. Bede yem klowil laen dù sónen yó, hol lemwót bè Dwata abay se laen dù tul katayen se kun. Yem kehbalingen tekuy kun ngà hlanen bè udélen. Yem kungol te du yem udél Dwata bè sulaten, hol lumun se ke du ne yem mudél ebélè tekuy. Ne bè kimón tekuy du, yó gunun hembaling tekuy kem kun ngà. Yem kun udél Dwata yó, laen kô dù nen e són.

# Là Matù Salà—Gmung Te Bè Dyisas Btik

## Fisus 2:1 ne 6

Yem tehe kegen ye yu ekni, là kô wen kimón ye ke Dwata. Hol lumun ke deng ye nù lem hatay lemwót bè yó kem salà nmò ye . . . Deng homong Dwata tekuy bè yem le kebtiken ke Kdays Dyisas, ne bud homongen tekuy snéen bè yem deng kehegetahen du ditu bè longit.

## Kulasi 3:1

Tahu se yem monu koni, hol lumun ke deng homong Dwata tu ne bè yem tehe kebtiken ke Kdays gu lem lebengen. Ne ni kmoen ni, deng myón Kdays fi bè kwanan Dwata ditu bè longit, yó se gunun gfan yem deng kehkamal Dwata du du yem clamangen. Ke deng te gomong bè Kdays, yake són ditu gunuhé nù nawa te.

## 1 Fitel 2:24

Bè yem tehe ktutuk le ke Dyisas bè yem koyu senfifay, deng nwiten ne yó kem salà tekuy, ne deng mom du tnaifik bè yem kut salà. Yó gunu Dyisas mò du yem yó anì tnagak te yó kem sidek gel nmò te, ne anì hol nù bè nawa te mò du yem hyu. Du se yem tehe ali glayam, ne tekuy se yem fen hyu bè kililen.

## Glasya 5:24

Yó kem tau deng gfi bè Kdays Dyisas, kenbè le ne mò du yó kem sidek knóyô lówó tau.

## Hdom 6:2 ne 11

Kban. Tô semflós mò salà igoen laen dù bud gmoen bélè te yem salà. . . . Senged se kuy, hol hentahu ye yem klaen dù bud gmoen bélè ye yem salà. Snalig ye yem kwen lomi klowil blay Dwata kuy lemwót bè yem deng kegfi ye bè Kdays Dyisas. Yake són Dwata dé nimón ye ni kmoen ni.

## **Yem Klowil Laen Dù Sónen**

**Ke tódô loloen kihu kun kóyô yem tau, angat gutahen hatay laen dù sónen. Okóm yem tau tendo lemolò yem kun kóyô yem Tulus Dwata, angat gutahen klowil laen dù sónen.**

—Glasya 6:8

**Bè yem tehe yu ekni, mon Dyisas, tey dê bè yó kem tehe fù tekuy matay nékét ulal ditu bè yem benwu laen dù menwu du. Tafak Dwata kul bè yem là kimón le. Okóm wen ulal blówón hmò Dwata ke Musis, sù Musis bè tfod koyu, ne htegen eta. Yó se tau nékét ulal lengalà edu yem ulal yó, là matayen. Lumun yem tehe kehteg Musis du eta bè hihol yem ulal blówón nmoen, lumun yó se angat kehteg le du eta yem niba le Ngà Tau, anì yó, kihu tau hemtahu béléen gutahen yem klowil laen dù sónen.**

—Dyan 3:14, 15

**Yó se gunu le gmuta klowil laen dù sónen lemwót bè yem deng ketngón le du tek són uu yem tahu Dwata, ne lemwót bè yem deng ketngón le do, ou yem Dyisas Kdays, yem deng hógówem elem benwu.**

—Dyan 17:3

**Yó se hemtahu bè yem Ngà Dwata gutahen yem klowil laen dù sónen. Yó se là mimón du yem Ngà Dwata, là kô gutahen du yem klowil laen dù sónen, ne gbóén yem tey kebut Dwata du. Yó se koni udél yem Dyan gel mabtays ebè yó kem tau gel lemolò du.**

—Dyan 3:36

**Tek sotu olo bayaden yem salà, són hatay. Okóm wen yem tódô blay Dwata, duhen yem klowil laen dù sónen, hlanen bè yem deng nmò yem ogot tekuy Dyisas Kdays.**

—Hdom 6:23

**Tódô tulónu kuy ktahuhen, mon Dyisas, yó se mungol yem dou udél, ne hemtahu bè yem hógów do, deng wen ne kun klowil laen dù sónen. Là gógówen elem tafak Dwata, okóm deng gutahen ne klowil laen dù sónen, balù ni kmoen ni.**

—Dyan 5:24

# Tngón Te Yem Deng Kegewà Te

Isaya 32:17

Ke ket tau mò du yem tedeng, yó gunun tódô hlós menek kbenwu le ne laen dù knikò le.

Glasya 4:6

Lemwót bè yem deng kngà Dwata kut, yó gunu Dwata bemlay du kut yem Tulus yem hol Ngaen. Ne yem Tulusen yó, du se fen hetngón du kut yem deng kngà Dwata kut, ne gbek te se kut tmaba ke Dwata MÀ.

Dyan 14:21

Mon Dyisas, Yó se tau temngón du yem dou hlau ne mimón du, yó se yem tau kembong nawa do. Ne angat kenbong nawa MÀ snéen kun yem tau kembong nawa do yó. Tey kbong nawahu du snéen dou, ne angate hegfan béléen.

Hdom 8:16

Yó sem Tulus Dwata heglileb du kut yem deng kngaen tekuy Dwata.

1 Dyan 3:18-20

E kem ngà, béen olo són bè sumung te yem kbong nawa te kem dumu te. Yake hol hegfan te bè yem kmò te ebélê le. Anì duhe kóm, gdilô yem deng kbaling te ngà Dwata ke hyu yem kmò te ebè kem dumu te. Ke tò megewu nawa te du yem deng kngaen kut Dwata, tu se temgel nawa te tum deng ktilob kmò te ebè kem dumu te. Ne sotu bud temgel nawa te yem alì ktedeng kkukumen tau yem Dwata, abay se deng kem tódô gotu tngónen kdéen.

1 Dyan 4:13

Deng sù Dwata bélê tekuy yem kun Tulus mò gunu tekuy temngón du yem là bud keskóhen bélê tekuy. Ne dalang se kut, là bud te skó béléen.

# **Yem Knù Dyisas Bélê Te Gunù Te Hligal**

## **Dyan 17:13**

Mon Dyisas, Ni, Mà, móyóne mulék edyó béléem. Ni se yem hnihu béléem bè yem tolo knuu dini ni anì hol gsengel kligal le ni kem dou tau lumun yem dou kligal.

## **Hdom 14:17**

Bè yem kogot Dwata tekuy, là kô ken du ne ninum du yem ali bong muhen. Yó dé hol bong muhen, duhen yem ktedeng nawa ne kenek nawa ne yem kligal. Yó se koni yem gel blay yem Tulus Dwata tekuy.

## **Glasya 2:20**

Lemwót bè yem deng kehtahuhu ke Kdays, henged denge gomong matay béléen bè yem tehe le ktutuk le du abay se du se leyu lówóhu. Dalang se bè yem tehe le kebtik Dwata du, henged denge gomong btik béléen snéen. Yem klowil nù béléu ni kmoen ni, sundu kô dou klowil du bede kun klowil Kdays abay se du deng nù béléu ne. Ne ni kmoen ni són yem Ngà Dwata gentud nawahu. Tey kbong nawan do, gloken fen hamà yem kun klowil anì wen lanu gewà gu lem hatay.

## **Isaya 12:3**

Lumun él hebóhen lem kfu yem tau meeng, bud lumun yó se kegsengel nawa yó kem tau deng henwà Dwata gu lem salà le.

## **Dyan 15:11**

Yó gunuhu tmulón du kuy nim ni, mon Dyisas, anì hol gsengel kligal ye lumun yem dou kligal.

## **Sam 16:11**

Deng tolokem do, Dwata, yem lan ebè yem klowil laen dù sónen. Bè yem knuem béléu gunuhu tendo hligal ne laen kô dù sónen yem kegsengel nawahu.

# **Yem Alì Kimón Te Ke Dwata Bong Muhen**

## **1 Samwél 12:15**

Bede ke là hnungol ye ke Dwata, ne ke là nimón ye du yó kem kun hlau, angat hnohon Dwata yu ne yem tau geta bélê ye.

## **Hdom 6:16**

Ngem wen tulónu kuy. Balù kihu yem alì nójô lolò ye bè kuy klowil, kaem deng duhen yó se henged amo nimón ye, ne deng ye hlós ghesek béléen. Ke són salà nójô lolò ye, deng duhen yó se henged amo nimón ye, hlós niten yu elem tafak laen dù sónen. Okóm ke són kimón ke Dwata nójô lolò ye, deng duhen yó se henged amo nimón ye, ne nwiten yu tedeng, olunen ebè yem klowil laen dù sónen.

## **2 Tesalenika 1:7-9**

Ne angat hdóhen ta ye yem kdéen gunu ye glayam, dalang se kum. Yó he angat kmò Dwata du nim ni sok hto yem buteng kkól Dyisas gu bè longit. Bè yem kesfulék Dyisas yó, angat mung du yó kem alì mfasang gel hógówen nù bè longit. Ne wen tey dilóf ofi mung du snéen mó tafaken yó kem tau hemkéng ke Dwata, dalang se yó kem tau là nimón le yem tulón hyu lemwót bè yem ogot tekuy Dyisas. Tey angat ktafaken kul. Tafaken kul yem tafak laen dù sónen. Gotu hdóhen lu bè soluhé. Là kô ton le du kul yem tey kgetahen ne yem tey kfasangen.

## **Dutelonomi 11:26-28a**

Yó udél Musis, monen, Nim kdaw ni héléku yu mahil du nójô ye, yem któbóng Dwata kuy duhen ke yem ktuleden kuy. Tnóbóngen yu ke nimón ye yó kem kun hlau yem Dwata gunu ye mogot. Okóm ke là nimón ye du, ne ke heksil ye ebè kem dumu dwata, tnuleden yu.

# **Yem Alì Gel Ktulón Te Ke Kdays Bong Muhen**

**Flifay 2:11**

**Ne kentihen sumung angat gotu mon du, Dyisas Kdays  
yem hol geta mogot kentihen. Ne bè yem kmon le du yó,  
yó se gunu Dwata yem Mà tekuy, hol megdóyón.**

**Matyu 10:32, 33**

**Sotu tulónu kuy, mon Dyisas, yem tau ke tulónen yem  
kloloen do lem blóng kem dumun tau, angat bud tulónu se  
kun yem deng ketngónu du bè solu Mà bè longit. Okóm,  
mon Dyisas, yem tau ke hnalaen yem kloloen do lem blóng  
kem dumuhen, angat hnalaau se kun bè solu Mà bè longit.**

**Hdom 10:9, 10**

**Yó gunum mon, ke hentahu ye yem deng kebtik Dwata  
ke Dyisas gu lem hatay, ne ke gel tulón ye yem deng  
khogot Dwata du du yem klamangen, yó se gunu ye angat  
gewà gu lem yem tafak Dwata laen dù sónen. Abay se  
lemwót bè yem kehtahu ye yem deng nmò Dyisas bélè ye,  
yó se gunun baling tedeng kton Dwata kuy. Ne lemwót bè  
yem gel ktulón ye du bè kem dumu ye tau, yó se gunu ye  
gewà gu lem yem tafak Dwata laen dù sónen.**

**1 Dyan 2:23**

**Abay se yem tau ke henkéngen yem kun Ngà Dwata,  
henkéngen snéen yem Maen. Okóm yem tau ke  
hentahuhen yem Ngà Dwata, hentahuhen snéen yem  
Maen, lelen gel tmulón du bè kem dumuhen tau.**

**Luk 9:26**

**Mon Dyisas, Yó se tau limengen yem ketngónen do, ne  
là nbólen du yem udélu, là kô angat henkmón yem Ngà  
Tau du sok bud semfulék edini ne e mogot benwu. Bè yem  
angat kesfuléken edini yó, angat gfan yem kun kfasang ne  
yem kun kfasang Maen, dalang se yó kem gel hógów  
Dwata lemwót gu bè longit.**

# Seitan, Yem Ali Hohon Tekuy

## 1 Fitel 5:8

Bê tekuy abay gel hlingay, ne eles tekuy hol temgama. Abay se wen yem Seitan, kul ogot yó kem busaw, ne tey sidek khohonen tekuy. Hfeng te du yem gel nmò Seitan, lumun ke ógóf lóbô lem bnes ali sidek kbitilen. Són moen mebel kenfóen mò nséken. Hol lumun yó se yem khebel Seitan lanen kemfô tekuy anì niten tekuy glayuk bë Dwata.

## Matyu 4:1 ne 10, 11

Kogol yem kehabbtays Dyisas ke Dyan, ominen mit ke Dyisas yem Tulus Dwata etu bë yem benwu laen dù menwu du. Ditu gunu Seitan tendo tò smindil ke Dyisas ... Bnalà Dyisas se, monen, Mdóhi bë ni, Seitan. Igò Dwata deng mon du bë sulaten, monen, Són bélén gunuhem mogot, ne són o hol nimónem. Tahu se, tódò tnagak Seitan Dyisas, ne sen-gengen se wen hógów Dwata gu bë longit gdek bë yó mò tmóbóng ke Dyisas.

## 2 Tesalenika 2:9

Bè yem kun kehegfán yem tau ali matù ke Dwata yó, Seitan fen htulus du. Ne tey dê hentaw ton nmoen anì hol le gsukat béléen yó kem tau.

## Fisus 6:11

Dikót te dé yó kem ngom sfatay deng blay Dwata kut anì laen dù gmò Seitan bélê te bë yem dê lanen tò hmolot kut.

## Nmò Yó Kem Hógów Dyisas 26:18

Abay se lumun ke butô le, ne uu fen hton kul. Hol lumun ke nù le lem kifu, ne uu fen malak kul elem layag. Yó gunuhu hógów kóm anì knogol le yem kogot Seitan kul, ne beklil le ebè Dwata anì hnifót Dwata salà le, ne baling le tau nogot Dwata se kul. Yó se yem udél Dyisas ebéléu, mon Fol.

# **Yem Katù Bè Seitan**

## **2 Tesalenika 2:8**

Sok deng hlus yem tolo semgafas du, yó he kehegfanen yem tau gel natuen Dwata. Okóm angat genlà Dyisas. Balù yó hem olo kun udél Dyisas sana tódô gunun meglà. Sélétem mon bè yem angat kehegfan Dyisas bè yem angat kkólen. Ngem kà angat tódô kéng lungoy abu mò kton le du.

## **Dyim 4:7, 8a**

**Yó gunum mon, hol nimón ye Dwata, ne natù ye Seitan anì mlóy hlayuk bélê ye. Hol ye hloni ebè Dwata anì hloni ebélê ye snéen kun.**

## **Hiblu 2:14**

**Yó kem ngà mon Dyisas yó koni, kem tau se myó. Ne yó gunu Dyisas baling tau mò fen matay anì wen lanen mseng yem kun kgis Seitan mogot yem hatay.**

## **Hdom 8:35 ne 37**

Tulón te kuy kóó. Laen kô dù gembek semkó tekuy bè yem kbong nawahen tekuy Kdays. Kihu sut bélê te, ke gfà duhen ke yem alì mgel, duhen ke hnayam le tekuy lemwót bè kehtahu tekuy, laen kô dù gembek semkó tekuy bè Dyisas. Ne senged se ke bè bitil bong, ne anien he ke mógròw te là mnes abay se laen dù gunu te ma, senged nóm, laen dù gembek semkó tekuy bè Kdays. Ne baluen ke nù te lem yem tey sefngilam, ne baluen ke efet mom hnayam le tu, sana yó ne yem kbong nawa Kdays tekuy. Laen dù gembek semkó tekuy béléen. . . . Okóm lemwót bè yem tóbóng Dyisas, yem fen kembong nawa tekuy, yó gunu tekuy gnù tofi ta bè ni kem mgel gel sut ni.

## **1 Dyan 3:8**

**Yem tau són moen mò salà, du se kun tau Seitan, yakà Seitan du hol gna mò salà lemwót bè kbuten. Yó se gunun tehe hbaling tau Dyisas anì nen e nmò sónen yem nmò Seitan.**

# Kesbong Nawa Ilô Yem Ngà Dwata

## 1 Dyan 4:20

Ke yó mon yem sotu tau, ke monen, Bong nawahu ke Dwata dou, okóm ke tolo knutó nawahen yó kem dumuhem hemtahu, odoyen yem monen yó. Ke là bong nawahen yó kem dumuhem hemtahu yem hol hyu ton matahen, sélét mom tō kenbongan nawa Dwata ne, yem là ton matahen du.

## 1 Kudin 13:1

Baluen ke wen khulungu mudél bè udél yó kem dumu tau te tonok, ne baluen he ke gbeku mudél bè kul udél yó kem hógów Dwata gu bè longit, tedu se bang gunuhen ekól du yem kenhulungu yó ke là kenbong nawahu kem dumuhu. Yem khulungu yó, hol lumun tō uni blówón ne uni tmutuk lata laen dù mdengen bnoluyen.

## Dyan 13:35

Mon Dyisas, Bè yem kesbong ye nawa, yó se gunu kdéen tau dmilô du yem klolò ye do.

## Glasya 5:22, 23a

Okóm wen bunguhem yem tendo khalak te bè Tulus Dwata. Yó bunguhem, duhen yem kesbong nawa ne klaan nawa ne kenek nawa ne kanay nawa ne klendey nawa ne kehyu kmò. Ne dumuhem, là kili nawa ne kganag nawa ne khulung mafas nawa.

## Dyan 21:16

Bud mon Dyisas mò ke Fitel, Tahu bong nawahem do kô? Bud mon Fitel se, E, tngónem se yem kbong nawahu kóm. Bud mon Dyisas, Sen-gyokem do sen yó kem ubihahu.

## 1 Dyan 3:14

Lemwót bè yem kbong nawa te kem dumu te hemtahu gunun gdilô yem deng kegewà tekuy gu lem hatay, ne yem deng keblay Dwata kut yem klowil laen dù sónen. Okóm yem tau là hulungen kembong nawa kdumun, yó se tau deng gelem elem hatay.

# **Yem Deng Kebtik Dyisas Kdays Gu Lem Hatay**

## **Nmò Yó Kem Hógów Dyisas 10:39-41**

Deng hunù gтануд me se kum yem gel nmoen bè  
klamangen benwu yó kem Dyu, dalang se yem nmoen bè  
Yusalim efet yem ktutuk le du bè yem koyu senfifay.  
Okóm bè yem getluhen kdaw bud bentik Dwata. Ne kogol  
yem kebtiken yó, tey dê tau na gunun bud hegfan. Okóm  
là tódô óyô tau du gunun hegfan, són yó kem tau deng  
hetfing nélék Dwata, duhen mi. Deng hyu na me seyón du  
mken kogol yem deng bud kebtiken.

## **Hdom 4:25**

Deng fen tódô matay Dyisas bè salà tekuy, bede deng  
bud bentik Dwata gu lem hatay. Yó se yem deng nmò  
Dwata mò gunun tedeng ktonen tekuy.

## **Dyan 20:26-28**

Tikóng deng gefet sotu fedyanen bè yó, gotu le bud  
stifun yó kem gel lemólò du, nù bélê le Tumas. Tey bud  
kehget ktikeb le beng le. Tódô bud hetnga sut lem blóng le  
Dyisas, monen mò kul, Bê ye abay hlikò. Bud ni ou.  
Ominen mon du mò ke Tumas, Ni hnénégem hólólu, ne  
nogotem haliu. Ne ni suem bè sol halì bè klabihu  
henmuem. Béem bud hegewu nawahem, hol hentahuhem  
yem deng kebtiku. Mon Tumas se, Tahu se. Uu se yem  
dou gunu mogot, ne dou Dwata.

## **Malk 16:9**

Hol mwas bè Akad se btik Dyisas gu lem lebengen. Bè  
yem kebtiken, nen ne gna hegfan bè yem Midi lemwót bè  
Megdala. Nim Midi ni, botong hitu busaw tehe hdó Dyisas  
gu béléen.

# Yem Deng Kebtik Dyisas Mò Nefet Nawa Te

Wen tulónu kuy kóó lemwót bè yem kbabtays tekuy. Gotu tngón ye se yem gel kehbabtays tekuy mò ilô yem deng kegfi tekuy bè Kdays Dyisas. Bè yem kbabtays le kut, hol lumun ke deng te gomong bè Dyisas bè yem tehe khatay le du, abay se du se leyu lówó tekuy. Hol lumun ke deng te gomong lebeng béléen snéen. Yó gunu te gomong bè yem katayen anì gomong te snéen bè yem bud kebtik Maen du gu lem lebengen, ne anì homong benlay Dwata tekuy lomi klowil. Lemwót bè yem lomi klowil blayen kut, yó gunun baling hyu yem gel kmò te. Bè yem tehe kebtik Dwata ke Dyisas, yó gunu te mton du yem tey genbek Dwata. Ke gomong te matay béléen, gomong te snéen bè yem bud kebtik Dwata ke Dyisas yó. Ne bè yem lomi klowil blay Dwata du bud te gomong du snéen. . . . Ke deng nù bélê te Kdays, deng wen ne yem lomi klowil te. Angat matay se yem lówó te abay se lan salà. Okóm yó dum lomi klowil te yó, là kóen ne e matay kun, yakà deng tedeng kton Dwata kut lemwót bè yem deng nmò Kdays bélê te. Tehe bentik Dwata Dyisas bè yem tehe katayen. Ke nù bélê te se yem Tulus Dwata, angat bud bentik Dwata tu snéen kut sok te angat mlef, hlanen bè yem Tulusen deng hnuen bélê te.

—Hdom 6:3-5; 8:10, 11

Tódô tulónu kuy ktahuhen, mon Dyisas, ke hningunu yó kem tau là dengen hemtahu béléu, hol lumun ke deng le mlef. Okóm ni, lemwót bè kungol le du udél yem Ngà Dwata ne nimón le, lumun ke deng le bud mowil, ne angat guta le yem klowil laen dù sónen . . . Bê ye hentaw nim monu ni, mon Dyisas. Angat wen kdawen khungol le du yem udélu yó kem tau nù lem lebeng. Ne bè yem khungol le du, angat le gotu bud btik gu lem lebeng le. Yó se tau deng tehe mò du yem hyu, bud btik ne gutahen yem klowil laen dù sónen. Bud btik snéen kun yem tau tehe sidek nmoen, okóm hlós elem lanaw ofi.

—Dyan 5:25 ne 28, 29

# **Yem Kmò Khólós Bè Dwata**

## **Luk 1:73-75**

Wen tehe fasad Dwata ke Bdaham, yem tehe fù tekuy. Yó fasaden, monen, Là kóen mulék elem baku nim monu mò kuy ni. Angat lenwau yu he lem tdoc yó kem hohon ye anì menek yem klolò ye do, ne anì btol yem kmò ktonu kuy, ne anì laen dù boolen yem gel kmò ye efet kól bè kukol towok ye.

## **2 Kudin 7:1**

Tu se koni yem deng fasad Dwata tekuy yem kngaen tekuy. Yó gunum mon, gotu kó te ne yem kdéen sidek gel nmò te ne yem kdéen sidek gel hendem te, anì laen dù bud belenen yem gel kmò te. Yó gunu te mò nim ni lan te kmikò mulé ke Dwata.

## **2 Timuti 2:21**

Senged se ke bè tau. Ke yó nójóem yem kwen mu Dwata kóm, hetsiki bè salà, ne angat wen tey mu Dwata kóm. Nù ne kem muhen kóm, syan ke dengi eles hólós.

## **1 Fitel 1:2**

Deng tehe eles tngónen tekuy Dwata, yem Mà tekuy bè longit, ne deng néléken tekuy mò kem tau là teklé te kwangen. Bede hlanen bè yem Tulusen yem nmoen bélè tekuy yó. Yó gunu Dwata mò du bélè tekuy yem yó anì baling kuy tau mimón ke Dyisas Kdays ne anì mkó ta kuy yó kem salà tekuy mlan bè yem deng khamà Dyisas yem kun litô bélè tekuy. Yó hol kóyóu bélè ye ke tendo temnù yem któbóng Dwata kuy, ne ke metnù snéen yem kenek nawa lemwót bélén.

## **1 Fitel 1:15**

... abay se deng tnaba Dwata tekuy mò kem ngaen. Ne yem Dwata, laen kô dù belenen bè kmoen. Yó se hol dnalang te se kut bè kut kmò.

# **Yem Kmò Khólós Bè Dwata**

## **Isaya 35:8**

**Angat tey lan lamang tahà bè yó. Angat boluyen, Lan yó kem tau deng mólós. Bong yó kem tau là mólósen, là kô le ne e glan bè yó.**

## **Hiblu 13:12**

**Yem kdutung le du ditu yó, wen hnigaden, duhen yem ali keglayam Dyisas ditu sentu beng yem benwu le lanen hamà litóen mó hkó salà yó kem tau.**

## **1 Dyan 1:9**

**Okóm ke gotu benkas te ebè Dwata yó kem salà deng gel nmò te, tódô hnifóten bélê te, ne gotu kóhen bélê tekuy yó kem kdê nmò te là hyuhen. Tey gsalig yem Dwata. Là gbeken du ke là hnifóten kut, yakà deng fen nbô Dyisas du bélê tekuy yó kem salà tekuy bè yem fen le tehe katayen.**

## **Matyu 3:11**

**Béléu do, mon Dyan, olohu mabtays kuy mó ilô yem deng kehgsel ye. Okóm wen huli do mkay sentahu kfasangen. Baluen ke tóe hesek béléen là kô me sekluun abay se tey geta kun. Yó angat kun nmò bélê ye, angat suen bélê ye yem Tulus Dwata, ne angat tendo gel kóhen bélê ye yó kem salà ye.**

## **Fisus 1:4**

**Gu laan Dwata là deng dmimun mó du he yem benwu, deng kem gegna ne yem kéléken tekuy mó kem ngaen. Eles tódô tngónen yem angat kegfi tekuy bè Dyisas, yó se lewót yem kéléken tekuy mó kem ngaen. Yó gunun mélék tekuy anì gotu kóhen yó kem gunu tekuy là mólós, anì laen dù bud gunuhem temdok tekuy.**

# Kem Tau Galak Bè Tulus Dwata

Luk 11:13

Bà se yem kuy là kgulit se kuy, mon Dyisas, sana khulung ye bemlay yó kem ngà ye yem hyu bélê le. Milud he yem Mà ye bè longit ke hni ye béléen yem kun Tulus, tódô blayen kuy.

Nmò Yó Kem Hógów Dyisas 1:8a

Bede angat wen se kuy kegbek kesok sut bélê ye yem Tulus Dwata. Ne angat sensból ye yem deng nmou lem blóng yó kem tau ....

Isikyél 36:27

Angat hnuu bélê ye se yem dou Tulus, mon Dwata, anì hol glolò ye yem hlolou kuy, ne anì eles ten-gama ye yó kem hlau deng blayu kuy.

Hdom 8:9

Okóm tólóng yó dum kut. Deng nù bélê te ne yem Tulus Dwata. Deng te galak béléen ne, là bud te galak ne bè yem kut knóyô. Okóm ke là nuen bélê te yem kun Tulus Kdays, là deng te baling kun tau he.

Nmò Yó Kem Hógów Dyisas 13:52

Okóm là kóen mili yem kehligal le yó kem tau lomi hemtahu bè Dyisas bè Antyok. Són mò le halak bè yem Tulus Dwata.

Nmò Yó Kem Hógów Dyisas 4:31

Kogol yem kni le tódô msinsig yem gunù gunu le nù. Yó se ilô yem khungol Dwata kul, ne ominen bud hemsù du bélê le yem Tulusen. Ne laen dù bud klikò le tmulón du yem udél Dwata.

# Kem Fasad Alì Hyu Ebè Kem Tau Dyisas

Sam 34:18

Tendo hloni bè yem tau lebà nawahen yem Dwata, ne gel tnóbóngen yem tau laen dù gentud nawahen.

Isaya 66:2

Mon Dwata, Tódô kdéen ton, hlò dou dlimun, ne ou se funen yó kem kentihen dlimunu yó. Balù yem tey kfasangu yó, monen, bong hyu nawahu bè yem tau hulung heglaan bè kem dumuhen, yem tau mahil hegsel, yem tau likò mulé do.

Són Bok Snulat Dyan 21:4

Angat gotu nifuhen yem lewok bè mata le, ne laen dù bud tau matay ne, ne laen se dù bud gunu le langag. Ne laen dù bud nkik le ne, ne laen se dù bud tenduk le abay se deng gotu lana ne yem gnan.

Sam 37:3

Hol genléed nawahem Dwata, ne henlelem mò du yem hyu. Ke yó se gel nmoem, angat menek kbenwuhem, ne laen kô dù hemsidek kóm.

1 Fitel 4:12, 13

Ne yó ne, kem do dumu ston nawa, bê te tennga yem tey keglayam te ni kmoen ni lemwót bè yem kehtahu te bè Dyisas, abay se ni se mò gunu Dwata hol tmilów kut. Sana ni ne kmoen bè yó kem tau hemtahu, sal wen gunu le glayam. Yake hligal te dé ke wen gunu te glayam ni kmoen ni abay se deng te gbót ne bè yem tehe keglayam Kdays. Ke gbek te hbala lumun yem kun, angat tey kegbót te hligal béléen snéen ke sok hegfan Dwata bè kdéen tau yem tey kegeta Kdays Dyisas.

# **Yó Kem Fasad Ke Wen Sindil Sut**

## **Hiblu 2:18**

Deng gburunù Dyisas yem tey sidek gnóm ekni yem le ksindil Seitan du. Yó se gunun aì hulung tmóbóng yó kem tau gel snindil Seitan ni kmoen ni abay se deng tehe gnómen snéen kun yem sindil.

## **Hdom 16:20**

Yó hem Dwata hol bemlay kuy kenek nawa. Ne hol ndaen Seitan elaan he anì laen dù gmoen bélê ye. Ne yó hem ogot tekuy Dyisas Kdays hol semflós tmóbóng kuy.

## **Sam 34:19**

Yem tau tedeng kmoen, sal gel dê hlayamen, okóm Dwata fen gel lemwà du gu lemen.

## **Isaya 43:2**

Yó udél Dwata bè yó kem tauhen, monen, Kehlingunu du yó kem mgel gel sut bè klowil tau, monen, hol lumun ke mifal ye él ngelem, duhen ke mlan ye gu lem ofi. Balù nù kgelen yem gel sut bélê ye, mon Dwata, là kô gehsideken kuy lemwót bè yem là keskóhu bélê ye.

## **Hdom 8:28**

Deng tngón te se, nù kihu sut bè klowil yem tau kembong nawa ke Dwata, sal gel hlan Dwata bè yem hyu béléen yem tau yó. Ni kem tau tnóbóng Dwata ni, lu se kem tau deng tmimul bè yem ktaba Dwata kul mò ngaen. Tnabahen lu abay se wen hyu atulen bélê le.

## **1 Kudin 10:13**

Laen dù sindil Seitan kut ke là deng gnóm kem dumu tau du se kul. Okóm tey gsalig yem Dwata, là kô bayaen du kut yem là gbek te du, sal gel wen lan nmoen mò lan te gewà anì là btang te.

# Kem Fasad Bè Kem Tau Là Mili Kehtahu Le

## Són Bok Snulat Dyan 3:12

Mon Dyisas, Yem tau là monol yem kloloen do, ke hningunu lumun ke hehek mbegel angat suu bè gunù Dwata bè longit, ne là kóen bud skibol bè yó ne. Ne dketu béléen se yem boluy Dwata, dalang se yem dou lomi boluy. Ne bud dketu béléen snéen yem boluy yem benwu Dwata. Yem benwu Dwata yó, yó se yem lomi Yusalim, yem benwu angat tuntun Dwata gu bè longit.

## Són Bok Snulat Dyan 3:5

Ket tau là monol yem kloloen do, angat benlayu nes bukay, ne là kô kóhu du yem kun boluy bè yem bok gunu smulat boluy yó kem tau gmuta klowil laen dù sónen. Ne angat tulónu ke Mà ne yó kem gel hógówen gu bè longit yem deng kmungen do.

## Són Bok Snulat Dyan 3:21

Yem tau là monol yem kloloen do, angat mung béléu bè yem tey kegetahu ne yem tey kfasangu. Hol lumun yem kegmungu bè yem kun kegeta Mà ne yem kun kfasang, lumun yó se yem angat kegmungen do. Yakà denge matù bè Seitan.

## Són Bok Snulat Dyan 21:7

Yem tau là monol yem kloloen do, angat blayu du yem klowil laen dù sónen. Ou se yem kun Dwata, ne du se yem hol ngau.

## Són Bok Snulat Dyan 2:7

Yem tau wen klinguhen, hol hnungolen dé yem tulón yem Tulus Dwata bè yó kem tau hemtahu bè ket benwu. Yem tau là monol yem kloloen do, angat hkenu du yem bungu yem koyu hlowil tau tmowok bè benwu Dwata. Yem koyu monu yó, duhen yem klowil laen dù sónen.

# **Wen Udél Dwata Ebélé Tekuy Gbak Bè Keskó**

## **1 Kudin 7:10, 11**

Ne ni udélu ebè yó kem tau hemtahu deng myehen. Là tódóen lemwót béléu nim monu ni, okóm deng tehe gel hlau Dyisas snéen kun, yem monen, Yem tau ke myehen là kóen hyu ne ke bud kóhen. Okóm ke wen libun deng skó bè yem kun tuha logi, hol béen abay bud myehen bè dumu logi. Song hyu kyehenen ke tódô bud nuléken yem kun gna yehen.

## **Luk 16:18**

Ne bud mon Dyisas, Yem tau ke kóhen yehenen ne bud myehen dumu libun, deng salà bè Dwata abay se ndaen yem libun gna yehenen. Dalang se yem logi bud myehen yem libun deng skó bè kun tuha logi, deng gemsalà bè Dwata snéen kun. Ni se yó kem dumu tulón Dyisas kul.

## **Hdom 7:2, 3**

Hningunu bélê ye bè tau syehen yem toluku kuy. Monen bè yem hlau Dwata, là kóen kendel bud myehen yem libun ke tolo mowil yem tuha logihen. Song hyu bud kyehenen ke deng matay yem gna tuha logihen. Ke kendel bud myehen igoen tolo mowil yem gna tuha logihen, yó gunu le mon du mò du mdà yehen. Okóm ke deng matay se yem gna tuha logihen, là kô monem du mò du mdà yehen ke bud myehen, ne là kô nuléhen du yem hlau bè kesyehen.

## **Matyu 5:32**

Okóm yem dou tulón kuy, monen, là hyuhen ke wen logi tódô kóhen yehenen igoen là mdà du yem libun. Ke bud gemyehen dumu logi yem libun yó, ten-geeden hegsalà du bè Dwata yem logi gna yehenen. Ne yem logi bud myehen du yem libun yó, bud gemsalà bè Dwata snéen kun.

# **Yem Bud Ksut Kdays**

## **Dyan 14:3**

**Ke deng gotu hentifesan bélê ye yem gunu ye angat nù, mon Dyisas, bude semfulék edini new e nangay yu. Yó se dou gunù nù, yó se kuy angat gunù nù.**

## **Són Bok Snulat Dyan 3:11**

**Ni là kóe hol bud hléét ne, móyóne bud kól, mon Dyisas. Bê ye abay tebel yem kehtahu ye anì laen dù gemwa du bélê ye yem kuy angat ofol.**

## **Malk 8:38**

**Mon Dyisas, Yó se tau limengen yem ketngónen do, ne là nbólen du yem udélu lem blóng yó kem tau deng kmogol ke Dwata lan le gel mò sidek, là se angat kenmón yem Ngà Tau du sok bud semfulék edini ne e mogot benwu. Bè yem bud kesfuléken yó, angat gfan béléen yem tey kfasang Maen, ne gotu le angat mung du yó kem hógów Dwata gu bè longit.**

## **Matyu 24:30**

**Omin le yó he mton yem kun ilô gu bè longit, yem tehe niba le Ngà Tau. Bè yem kton le du ne tódô kentihen tau mò sidek talak tonok gotu le demumu mkik lemwót bè khuli sel le. Tódô ton le se yem Ngà Tau htuntun gu tta mung bè lobun. Angat ton le se yem tey kfasangen ne yem tey kehekluunen.**

## **Dyim 5:8**

**Dalang se kuy, hol hanay ye nawa ye mangat du kkól yem ogot tekuy Dyisas. Hgel ye nawa ye, yakà dengen moni ne kkólen.**

## **Matyu 24:27**

**Bè yem angat bud kkól yem Ngà Tau, mon Dyisas, hol lumun mkal silà, tódô lemayaag klamang longit. Tódô kdéen tau gotu mton du.**

# **Yem Bud Ksut Kdays**

## **1 Dyan 3:2**

Ni ne deng kuy baling ngà Dwata, kem dumuhu sogot nawa, okóm là deng getnef te du he yem kun angat gunu ehembaling kut Dwata. Okóm hyu deng eles tngón tekuy bè yem angat gotu keston tekuy ke Dyisas, gotu tekuy angat mkél du, abay se laen dù bud gunun glit ktatawen bè yem kton te du.

## **Són Bok Snulat Dyan 16:15**

Bè yem igou mton kul ni kem ni, wen udél Dyisas btang lem klinguhu, monen, Angat le gotu ketut soke bud kól, lumun keketut le sok sut bélê le yem tau mnagaw. Hyu nawahen kun yem tau eles mingat do, yem tau deng eles nulónen yem kkólu anì laen dù gunun myak béléu.

## **Luk 12:40**

Ni bud huléku edu, mon Dyisas. Eles tendo ningat ye yem bud kkólen elem blóng ye yem niba le Ngà Tau, abay se kulel angat kkólen bè yem kdaw là kgingat ye du.

## **Nmò Yó Kem Hógów Dyisas 1:11**

Mudél yó kem hógów Dwata gu bè longit ebè yó kem tau, mon le, E kem tau lemwót bè Gelili, laen mu ye kat alì temngel ebè longit. Abay se tum Dyisas deng hegkay etta tu koni, angat bud semfulék edini he. Lumun sem tu ne koni kmungen bè lobun yem angat kehtuntunen edini bè yem angat bud kesfuléken.

## **Matyu 16:27**

Angat wen kdawen bud kesfuléken yem tehe niba le Ngà Tau, mon Dyisas. Bè yem angat kesfuléken yó, angat gfan béléen yem tey kfasang Maen bè longit, ne angat mung du yó kem gel hógów Dwata gu bè longit. Ne angat gotu blayen kem tau yem balà yem tehe deng gel nmò le.

## **Luk 21:27**

Omin le yó he mton yem niba le Ngà Tau htuntun gu tta mung bè lobun. Angat ton le se yem tey kfasangen ne yem tey kehekluunen.

# **Yem Udél Dwata**

**Luk 21:33**

**Angat tódô kmanas yem longit ne dalang se yem tonok.  
Okóm yem dou udél, mon Dyisas, là kóen ne e lana.**

**Matyu 22:29**

**Bnalà Dyisas lu, monen, Tey salà yem kehedem ye abay  
se là tngón ye du yem udél Dwata dilou, ne là se tngón ye  
du yem kfasang Dwata.**

**2 Fitel 1:21**

**Abay se laen dù tugod Dwata tódô lembù mò tulón ke là  
lemwóten bè Dwata. Sal gel htulus Dwata yó kem gel  
tugoden anì hol tugod le yem kun udél.**

**2 Timuti 3:16**

**Yem gel senfala te bè sulat Dwata, sal lemwót béléen.  
Yó gunu Dwata hsulat du anì gel tnóbóngen tu bè yem gel  
ktolok te. Bè yó gunu te hetnef du yem gel kenbê Dwata  
bélê te. Ne ke wen gunu te gesyat, hlauhen kut yem lan te  
bud beklil ebéléen. Ke hol dnalang te yem udél Dwata, yó  
gunun lemwót gulit ktau te.**

**Sam 119:11**

**Deng hol suu bè nawahu yem kóm udél, Dwata, anì là  
guléhu kóm.**

**Sam 119:105**

**Yem kóm udél, Dwata, mò henged solok yem gunuhu  
mdà, ne mò hlayag yem dou lan.**

Published in numerous languages as God supplies funds in answer to prayer. If you would like more copies for prayerful distribution, write in English. Specify which language(s) you need and how many booklets.  
**World Missionary Press, PO Box 120, New Paris, IN 46553-0120 USA**

**Deng gotu sentifes Watson Goodman**

**Tódô blay—là gehbalù du**



Read booklets online or by App  
[www.wmp-readonline.org](http://www.wmp-readonline.org)